

Sé um óhæft kjöt að ræða, skal hann hlutast til um, að því verði eytt á tryggilegan hátt.

Honum er einnig heimilt að endursenda kjöt, ef það kemur í ljós, að stimpilmerkingu, spjöld og önnur auðkenni vantar eða eru í ósamræmi við gildandi reglur.

38. gr.

Ef kjötskoðunarlæknir verður var við, að sláturafurðir hafa óhreinkast eftir slátrun, lágnast, myglað o. s. frv., skal hann gera ráðstafanir til að vörum, sem óhæfar eru orðnar til manneldis, verði eytt á viðeigandi hátt. Jafnframt skal hann gæta þess, að sláturafurðir verði ekki fyrir skemmdum, óhreinindum eða spillist á annan hátt, meðan endurskoðun fer fram. Gildir það bæði um afurðir, sem berast frosnar til skoðunar og afurðir, sem þangað koma kældar.

39. gr.

Að lokinni endurskoðun skal auðkenna sláturafurðir með sérstöku stimpilmerki í bláum lit. Merkja skal hvern skrokk eða skrokkhluta með einu stimpilmerki að minnsta kosti. Yfirdýralæknir segir fyrir um gerð og auðkenni stimpla þessara.

40. gr.

Með mál út af brotum á þessari reglugerð skal farið að hætti opinberra mála.

Reglugerð þessi er sett samkvæmt lögum nr. 30, 28. apríl 1966, um meðferð, skoðun og mat á sláturafurðum, til þess að öðlast þegar gildi, og birtist til eftirbreytni öllum, sem hlut eiga að máli.

Landbúnaðarráðuneytið, 17. ágúst 1970.

Ingólfur Jónsson.

Þorv. K. Þorsteinsson.

REGLUGERÐ

um söluskatt.

I. KAFLI

UM SÖLUSKATT

1. gr.

Greiða skal í ríkissjóð 11% söluskatt:

1. Af innlendum viðskiptum eins og nánar er fyrir mælt í III. kafla reglugerðar þessarar.
2. Af innfluttum vörum til eigin neyzlu eða nota innflytjenda, skv. III. kafla reglugerðar þessarar.

2. gr.

Ríkissjóður greiði Jöfnunarsjóði sveitarfélaga 8% þess skatts, sem um ræðir í 1. og 2. tölulið 1. gr. reglugerðar þessarar.

II. KAFLI

UM SÖLUSKATTSKYLDA AÐILA OG TILKYNNINGARSKYLDU

3. gr.

Hver sá, sem selur eða afhendir í atvinnuskyni vöru eða verðmæti, og hver sá, sem innir af hendi vinnu og þjónustu, skal með þeim takmörkunum, sem gerðar eru í reglugerð þessari, innheimta söluskatt skv. 1. gr. og standa skil á honum í rikissjóð.

4. gr.

Söluskattskyldir eru m. a.:

1. Allir þeir, sem skattskyldir eru skv. lögum nr. 90/1965 um tekjuskatt og eignarskatt og hafa með höndum einhvern þann atvinnurekstur eða starfsemi, sem söluskattskyld er samkvæmt reglugerð þessari, og ekki eru sérstaklega undanþegnir söluskattskyldu.
2. Allir þeir, sem skattfrjálsir eru samkvæmt fyrrgreindum lögum um tekjuskatt og eignarskatt eða sérstökum lögum, ef þeir hafa með höndum sams konar eða hlíðstæða starfsemi eða viðskipti og þeir aðilar, sem skattskyldir eru skv. 1. lið þessarar greinar, svo og opinber fyrirtæki, þótt starfsemi þeirra sé ekki sama eðlis, enda séu þessir aðilar ekki sérstaklega undanþegnir söluskattskyldu.
3. Umboðsmenn og aðrir aðilar, sem eru í fyrirsvari fyrir erlenda aðila, sem reka hér á landi söluskattskylda starfsemi eða viðskipti.

5. gr.

Hver sá, sem í eigin nafni eða í umboði annarra, rekur viðskipti með söluskattskyldar vörur, svo og hver sá, sem stundar sjálfstæða starfsemi eða selur einhverja þá þjónustu, sem ekki er sérstaklega undanþegin söluskatti skv. 14. gr., skal ótilkvaddur senda skattstjóra, þar sem hann er heimilisfastur, tilkynningu um atvinnurekstur sinn eða starfsemi.

Þeir, sem hefja tilkynningarskylda starfsemi, skulu senda tilkynningu, áður en starfsemin hefst. Tilkynningar þessar skal senda á þar til gerðum eyðublöðum, sem fást hjá skattstjórum. Í tilkynningu skal greina nafn og heimilisfang aðila, firmanafn, ef það er notað, hvers konar rekstur sé um að ræða, hver eða hverjir séu eigendur og hver eða hverjir stjórnendur, framkvæmdastjóri eða prókúruhafi. Einnig skal gefa upplýsingar um önnur atriði, sem tilgreind eru á eyðublöðunum.

Ef einhver rekur starfsemi í fleiri en einni starfsemisgrein, skal hann senda tilkynningu fyrir hvern þátt starfseminnar, sem talinn verður sjálfstæð starfsemi eða sérstök atvinnugrein.

Skattstjórar skulu, hver í sínu umdæmi, gera skrá um alla þá, sem tilkynnt hafa starfsemi sína og fengið skirteini, er veita þeim heimild til að kaupa vöru, vinnu og þjónustu, án söluskatts, sbr. 6. gr. Eintak af skráum þessum skal sent rikisskattstjóra, svo og allar breytingar á þeim.

6. gr.

Sá, sem tilkynnt hefur starfsemi sína, skal fá sérstakt skirteini, og veitir það heimild til kaupa á vörum og vinnu til endursölu án söluskatts samkvæmt því, sem nánar er fyrir mælt, og með þeim takmörkunum, sem gerðar eru í 9. og 11. gr. þessarar reglugerðar.

Slík skirteini veita ekki heimild til að kaupa til endursölu án söluskatts:

1. Vörur, sem seldar eru í smásölu, sbr. 1. lið 33. gr.
2. Vörur þær, sem Áfengis- og tóbaksverzlun ríkisins selur, sbr. 3. lið 33. gr.
3. Benzín og olíu, sbr. 4. lið 33. gr.

4. Vörur, sem seljandi telur vafa leika á, hvort heimilt sé að selja handhafa skirteinis án söluskatts. Í þeim tilvikum er seljanda óheimilt að falla frá innheimtu söluskatts, sbr. 24. gr.

Skirteini þessi skulu gefin út til ákveðins tíma, en falla þó jafnskjótt úr gildi og skirteinishafi hættir starfsemi þeirri, sem þau taka til, enda ber honum þegar í stað að tilkynna það viðkomandi skattstjóra. Einnig skal skirteinishafi tilkynna skattstjóra um breytingar á starfsháttum og heimilisfangi. Ef starfsemi hættir vegna félagsslita, gjaldþrots eða andláts, skal skilanefnd eða skiptaráðandi tilkynna slíkt.

III. KAFLI UM SÖLUSKATTSKYLDA SÖLU

1. Almennt

7. gr.

Greiða skal söluskatt af andvirði seldrar vöru og verðmæta og endurgjaldi fyrir hvers konar starfsemi og þjónustu, sbr. 1. gr., eftir því sem nánar er ákveðið í reglugerð þessari.

8. gr.

Söluskattskylda af seldri vöru eða vinnu skal almennt bundin við síðasta stig viðskipta, þ. e. sölu til neytenda. Neytandi telst sá, sem ekki endurselur vöru eða vinnu í atvinnuskyni, sbr. 9. gr.

9. gr.

Sé eigi annað fram tekið í reglugerð þessari, er sala á vöru skattfrjáls til kaupanda, sem ekki er neytandi, enn fremur til kaupanda, er kaupir hana sem efni í vöru, er hann hefur atvinnu af að framleiða og selja. Skilyrði fyrir því, að heimilt sé samkvæmt framansögðu að selja vöru eða vinnu án söluskatts er, að kaupandi hafi atvinnu af að selja sams konar vöru eða að hann noti sams konar vöru sem efni í vörur, er hann framleiðir og selur í atvinnuskyni. Síðara skilyrðið tekur þó eigi til neins konar óvaranlegra rekstrarvara eða hjálparefna, sbr. 11. gr., heldur einvörðungu til hráefna eða hálfunninnar vöru, sem tekin er til aðvinnslu eða úrvinnslu, og vöru, sem myndar efnisþátt eða hluta í nýrri vöru, svo og til fullunninna umbúða, sbr. þó 24. gr.

Eigi má selja vöru án söluskatts samkvæmt þessari grein til annarra en þeirra, er tilkynnt hafa starfsemi sína skv. 5. gr. og sýna heimildarskirteini frá skattstjóra um, að þeir hafi tilkynnt, að þeir hafi með höndum starfsemi sem endurseljendur eða framleiðendur vöru í viðkomandi starfsgrein og heimild til að kaupa vörur án söluskatts.

Með sama hætti og með sömu skilyrðum er skattfrjáls sala á vinnu, sem sá, er stundar sjálfstæða starfsemi, innir af hendi við framleiðslu vöru fyrir annað atvinnufyrirtæki, sem endurselur verðmæti vinnunnar með vörinni.

2. Söluskattskyld sala

10. gr.

Til söluskattskyldrar sölu á vörum, verðmætum og þjónustu telst m. a.:

1. Sala eða afhending frá smásala eða smásölufyrirtæki, þar með talin hvers konar pöntunarfélög, lausaverzlun, sveitaverzlun, tilboðasöfnun, sala vara í umboðs-sölu og sala við frjáls uppboð, einnig sala eða afhending frá heildsala eða heildsölufyrirtæki beint til neytenda.

2. Afhending vöru til greiðslu á vöru, vinnu, þjónustu eða öðru, sem láta á eða látið hefur verið í té.
3. Sala eða önnur afhending vara, vinna eða þjónusta látin í té af iðnaðarmönnum eða iðju- og iðnaðarfyrirtækjum, þar með talin afhending vöru, sem framleidd er eða unnið er að eftir pöntun, sbr. þó 14. gr.
4. Sala eða önnur afhending vara, vinnu eða þjónustu annarra aðila, sem stunda sjálfstæða starfsemi.
5. Úttekt úr eigin fyrirtæki, hvort heldur er til einkanota eigandans eða til nota í atvinnufyrirtækinu sjálfu. Gildir þetta bæði um aðkeyptar vörur og vörur, sem eru framleiddar eða sæta aðvinnslu í fyrirtækinu, svo og vinnu og þjónustu. Þetta tekur þó eigi til vöru, vinnu eða þjónustu, sem undanþegin er söluskatti.
6. Þjónusta viðgerðarverkstæða vegna eigin rekstrar.
7. Hvers konar sala, afhending eða þjónusta látin í té í matsölu-, veitinga- og gisti- húsum, þvottahúsum, efnalaugum, hárgreiðslustofum, rakarastofum og öðrum snyrtistofum, flutningastarfsemi, sem ekki er sérstaklega undanþegin, leiga á auglýsingakvikmyndum, véla- og önnur lausafjárleiga, afgreiðslu- og stöðvar- gjöld, uppskipunar- og útskipunargjöld, fyrirgreiðslustarfsemi ferðaskrifstofa og önnur slík starfsemi, sýningar í kvikmyndahúsum, leikhúsum og hvers konar skemmtistarfsemi, og tekur þetta einnig til sölu, afhendingar og þjónustu, sem innt er af hendi fyrir hina skattskyldu aðila sjálfa.

Til skattskyldra sýninga í kvikmyndahúsum eða leikhúsum teljast hvers konar sýningar, þar sem aðgangseyrir er greiddur, annaðhvort við inngang eða sem hluti af félagsgjaldi. Skiptir ekki máli, þótt sýningar þessar séu ekki fyrir almenning.

Til skemmtistarfsemi teljast hvers konar samkomur fólks, þar sem aðgangs- eyrir er greiddur, annaðhvort við inngang eða sem hluti af félagsgjaldi, svo sem söng- og annar tónlistarflutningur, fyrirlestrahald, dansleikir og fjölleikasý- ningar. Skiptir ekki máli, þótt samkomur þessar séu ekki opnar fyrir almenning.

Um innheimtu söluskatts af skemmtanastarfsemi vísast til 2. liðs 33. gr.

8. Sala hvers konar auglýsinga, sem ekki er sérstaklega undanþegin.
9. Leiga gistihúsa og samkomuhúsa, sbr. þó 6. lið 14. gr.
10. Sala á raforku og heitu vatni frá rafmagnsveitum og hitaveitum.
Eigi skiptir máli, hvort rafmagnsveita fær orku frá vatns- eða gufuaf- flstöð eða mótoraflstöð. Heitt vatn frá hitaveitu er skattskyld, þótt nokkur hluti hins heita vatns sé eigi jarðhitavatn. Þegar orka eða orkugjafi er notaður til hitunar á vatni, má draga innkaupin frá heildarsölu, enda sé söluskattur greiddur við kaup orkunnar eða orkugjafans.
11. Sala hvers konar váttrygginga, sem lög nr. 20/1954 taka til, nema sérstaklega sé undanþegin.

11. gr.

Ávallt skal innheimta söluskatt af orku, orkugjöfum, óvaranlegum rekstrarvör- um og hjálparefnum, sem eyðast við framleiðslu annarrar vöru eða við aðra notkun, sbr. 1. mgr. 9. gr., nema unnið sé að ræða sölu til verzlunar, sem innheimtir söluskatt af smásöluverði vörunnar.

Ákvæði 1. mgr. taka m. a. til eftirtalinnna vörutegunda:

1. Orka og efni til orkuframleiðslu.
Rafmagn, jarðgufa og hitaorka frá jarðhitaverum, brennsluolíur (svartolía, gasolía, steinolía, benzín), gas, kol, koks, viðarkol, mór og mótöflur.
2. Vörur vegna véla- og verkstæða.
Smurningsolíur hvers konar, skurðolíur, borolíur, smurningsfeiti hvers konar, tvistur, hreinsiefni, lóðningarfeiti, reimaolíur og reimavax, sandur vegna

málmsteypugerðar, slípiefni hvers konar, þar með talinn sandpappír, fljótandi og föst fægiefni, stálull o. fl.

3. Vörur til þvotta og hreinsunar.

Sápur, þvottaefni föst og fljótandi, vökvar til notkunar við fatahreinsun, þvottasóti, vítissóti, sótthreinsunarefni, mineral oliur, ræstiduft o. fl.

4. Efnavörur ýmiss konar.

Efnavörur til ljósmynda- og kvikmyndagerðar, ljósprentunar, sítunar, málmhúðunar, litunar, prentmyndagerðar, litprentunar, sterkar sýrur og basar, sölt og önnur þau efni, sem notuð eru við iðnað og framleiðslu, enda myndi þau ekki efnisþátt vörunnar. Enn fremur sprengiefni, bleikiefni, bleikijörð, síuleir (filter aid) o. fl.

5. Ýmsar vörur.

Hvellhettur, kveikipræðir, ketilsink, herzluduft, prentmyndamót, leturmót, dekkpappír, límbönd, umbúðapappír, stensilpappír, filmur til offset- og lithografprentunar, svo og önnur þau efni, sem að dómi skattýfirvalda falla undir skilgreiningu reglugerðarinnar.

12. gr.

Nú er vara, sem skattskyld er skv. III. kafla þessarar reglugerðar, flutt inn til eigin nota eða neyzlu, og skal þá sá, sem flytur inn vöruna, greiða af henni við tollafgreiðslu 11% söluskatt þann, sem um getur í 1. gr. þessarar reglugerðar. Skal skatturinn þá reiknaður af tollverði vöru, að viðbættum aðflutningsgjöldum, auk 10% áætlaðrar álagningar. Tekur gjaldskyldan til gjafa, sýnishorna og þess háttar, svo og til véla og tækja, sem sett eru í íslensk skip erlendis, enda sé ekki um nýbyggingu skips að ræða.

Undanþegnar söluskatti skv. 1. mgr. hér á undan eru vörur þær, sem um getur í 13. gr. þessarar reglugerðar, og auk þess vörur þær, sem taldar eru í 2. gr. tollskrárlaga, enda séu þær ekki endurseldar.

Ef fluttar eru inn vörur, sem ætlaðar eru til sölu, skal innflytjandi, áður en hann afhendir innflutningsskjölin til tollmeðferðar, hafa tilkynnt skattstjóra um starfsemi sína og hafa fengið hjá honum tölusett skirteini, sem sýnir, að tilkynningar-skyldunni hafi verið fullnægt. Þá skal innflytjandinn tilgreina á aðflutningsskýrslu, hvort vara er flutt inn til endursölu eða sem efnivara í söluvöru. Jafnframt skal hann tilgreina skirteinisnúmer. Hafi innflytjandi ekki söluskattskirteini, skal hann greiða söluskatt af vörunni við tollafgreiðslu, þótt hún sé flutt inn til endursölu.

3. Undanþágur

13. gr.

Sala á eftirtöldum vörum og verðmætum er undanþegin söluskatti:

1. Vörur, sem seldar eru úr landi.

Undanþágan tekur aðeins til útflutningsvörunnar sjálftrar, en ekki til vinnu eða þjónustu við hana, sem skattskyld kann að vera samkvæmt öðrum ákvæðum reglugerðar þessarar, sbr. einnig 11. gr.

2. Sala á nýmjólk, súrmjólk og undanrennu.

Þetta gildir þó ekki, ef um er að ræða sölu á mjólk í veitingahúsum, mat-sölum, veitingatjöldum eða öðrum greiðasölustöðum. Sala á öðrum mjólkurafurðum er söluskattskyld, svo sem rjóma, smjöri, skyri, ostum, mysu og þurrmjólk.

3. Sala á neyzlufiski, þó ekki sala á fiski, sem er flakaður, frystur og pakkaður í neytendaumbúðir í frystihúsum eða sala tilbúinna fiskrétta í verzlunum og veitingahúsum.

Undanþágan tekur heldur ekki til sölu á laxi, silungi, humar, rækju eða til sölu á öðrum fiski, sem sætt hefur einhvers konar vinnslu umfram venjulega aðgerð. Með fiski, sem sætt hefur venjulegri aðgerð, telst fiskur, sem er flakaður, saltaður, bútaður, hakkaður, reyktur (annar en álegg) eða frystur til geymslu í fiskbúðum, og er sala á honum því undanþegin söluskatti.

4. Fiskumbúðir og kjötpokar.
5. Veiðarfæri, svo og efni til veiðarfæragerðar og viðgerðar veiðarfæra.
Þessi ákvæði taka þó ekki til sporttækja og efnis í þau.
6. Salt, þó ekki ef það er selt í smásöluumbúðum.
7. Beita, en til hennar telst auk beitusildar önnur beita úr dýraríkinu.
8. Tilbúinn áburður, þó ekki ef hann er seldur í smásöluumbúðum og innhald með umbúðum vegur eigi yfir 5 kg.
9. Grasfræ.
10. Fóðurmjöl og hey, svo og annað dýrafóður.
11. Eldsneyti fyrir loftför.
12. Sala innlendra dagblaða og hliðstæðra blaða, svo og tímarita, sem ekki eru gefin út í ágóðaskyni.
13. Auglýsingar í dagblöðum, bókum, tímaritum, og öðrum ritlingum.
14. Sala á fasteignum, skipum, loftförum og loftfaravarahlutum.
Undanþágan tekur aðeins til sölu á nefndum verðmætum, en ekki til sölu á efni, sem notað er til byggingar þeirra eða smíða nema það sé undanþegið sérstaklega.
15. Sala á lausafé, sem seljandi hefur notað í eigin þágu eða við starfsemi sína, enda geti salan ekki talizt til atvinnurekstrar seljanda.
16. Sala á verðbréfum.
17. Heimilisnotkun framleiðenda landbúnaðar- og sjávarafurða á eigin framleiðsluvörum.
18. Heimilt er að endurgreiða söluskatt af efni, vinnu, vélum og tækjum í skip og báta, sem smíðaðir eru innanlands, eftir reglum, sem fjármálaráðherra setur. Má miða endurgreiðsluna við tiltekna fjárhæð á rúmlest.
19. Heimilt er að endurgreiða söluskatt af efni til flokkunaraðgerða skipa, svo og af efni til meiri háttar viðgerða skipa og skipsvéla.

14. gr.

Eftirtalin starfsemi og þjónusta er undanþegin söluskatti:

1. Vinna við húsbýggingar og aðra mannvirkjagerð, svo og vinna við endurbætur og viðhald slíkra mannvirkja. Á þetta við um, hvers konar mannvirki, og skiptir ekki máli, hver lætur vinnuna í té.

Undanþágan á þó ekki við um vinnu við framleiðslu eða aðvinnslu byggingarvara, sem fram fer í verksmiðju, verkstæði eða starfstöð, heldur tekur hún einungis til þeirrar vinnu, sem unnin er á byggingarstað.

Nú fer aðvinnsla á efni eða vöru að einhverju leyti fram á verkstæði eða í verksmiðju og að öðru leyti á byggingarstað, og er þá sú vinna, sem fram fer á byggingarstað, skattfrjáls, samanber þó næstu málsgrein.

Þegar settar eru upp vélar á eða í byggingarstað til aðvinnslu á vörum eða efni til mannvirkis, sem að jafnaði er unnið á verkstæði eða í verksmiðju, skal sú vinna eða aðvinnsla teljast skattskyld.

Uppsetning véla eða tækja í verksmiðju eða verkstæði skal teljast sölu-skattskyld, þótt vinnan fari fram á byggingarstað.

2. Vinna við skipa- og loftfaraviðgerðir, hvort sem hún er framkvæmd af verkstæðum, verktökum, einstökum iðnaðarmönnum eða öðrum. Á þetta bæði við

um viðgerðir á skips- eða loftfaraskrokkum, föstum vélum, tækjum og munum, sem telja má venjulegt fylgifé með skipum eða loftförum.

Undanþágan tekur aðeins til vinnu við viðgerðirnar, en ekki til sölu eða afhendingar efnis í sambandi við þær.

3. Vinna við viðgerðir veiðarfæra, þó ekki sporttækja.
4. Vöruflutningar, fólksflutningar almennra leigubifreiða, svo og sérleyfis- og hópferðabifreiða. Undanþágan tekur til vöruflutninga á sjó, á landi og í lofti.
5. Sala farseðla í ferðir milli Íslands og annarra landa.
6. Húsaleiga, sbr. þó 9. lið 10. gr. reglugerðar þessarar. Undanþágan á við um húsaleigu almennt, hvort heldur er til íbúðar eða atvinnurekstrar.

Þegar gisti- eða samkomuhús er selt á leigu til aðila, sem rekur það samfellt um tiltekinn tíma og greiðir söluskatt af þeim rekstri, skal eigi greiða söluskatt af leigutekjum leigusala.

7. Útfararþjónusta.
8. Rekstur sjúkrahúsa, fæðingarheimila, heilsuhæla og annarra slíkra stofnana. Undanþágan nær aðeins til þeirrar þjónustu, sem nefndar stofnanir láta í té, en ekki til vara, vinnu eða þjónustu, sem þær sjálfar þurfa að kaupa.

Til hliðstæðra stofnana í þessu sambandi teljast elliheimili, vöggustofur, barnaheimili, svo og hæli fyrir drykkjusjúklinga og lamaða og fatlaða.

9. Sala fasteigna, skipa, loftfara, verðbréfa og annarra þvilíkra verðmæta, en þar til teljast einkaleyfi, hlutabréf og hvers konar fjárkröfur, svo og húsaleigumíðlun.

Undanþágan tekur einnig til miðlaraþóknunar eða umboðsþóknunar til fasteigna-, skipa-, einkaleyfa- og verðbréfasala.

10. Lækningar og lögfræðistörf og önnur hliðstæð þjónusta. Til lækninga í þessu sambandi teljast ljós- og nuddlækningar, störf ljósmæðra og hjúkrunarkvænna, þjónusta sálfræðinga og uppeldisfræðinga, tannsmíði og tannviðgerðir, svo og framleiðsla gervilima og umbúða fyrir lamað fólk.

Þá telst hér til þjónusta endurskoðenda, verkfræðinga, arkitekta, presta og hliðstæðra aðila.

11. Sala listamanna sjálfra á eigin verkum. Enn fremur sala á einkarétti eða höfundarrétti að uppfinningu eða hugverki.

Undanþágan á eingöngu við um sölu höfundar á frumverkinu.

12. Sala neyzluvatns.
13. Notkun á heitu vatni frá sameiginlegum kyndistöðvum fyrir íbúðarhúshaverfi, sem reknar eru af íbúunum sjálfum að öllu leyti og á þeirra ábyrgð, enda sé söluskattur greiddur af innkaupum á þeirri orku eða orkugjafa, sem notaður er til hitunar á vatninu.

Undanþágan nær aðeins til notkunar á heitu vatni í íbúðarhúsnæði því, sem íbúarnir hafa sjálfir til einkaafnota.

14. Þjónusta banka og sparisjóða. Sama gildir um stofnanir og sjóði, sem hafa með höndum hliðstæða starfsemi, enda hafi þeir fengið opinbera viðurkenningu.
15. Aðgangseyrir að ípróttasýningum, ípróttamótum, skíðalyftum, kappreiðum og góðhestakeppni.
16. Fæðissala mótuneyta skólafólks og starfsmannahópa, svo og fæðissala atvinnurekenda til starfsmanna sinna.

Undanþágan tekur aðeins til fæðissölu þessara aðila, en ekki til sölu á efni til þeirra.

17. Skipa- og loftfaraleiga greidd af erlendum aðilum og í erlendum gjaldeyri.
18. Prentun dagblaða og hliðstæðra blaða. Öll önnur prentun er skattskyld.
19. Hafnar-, vita- og lendingargjöld.

20. Iðgjöld af seldum líftryggingum, farmtryggingum vegna flutnings milli Íslands og annarra landa, skipa- og loftfaratryggingum.

IV. KAFLI

UM TILHÖGUN BÓKHALDS, FYLGISKJÖL OG GJALDSTOFNA

15. gr.

Allir þeir, sem innheimta söluskatt, skv. 2. mgr. 2. gr. laga nr. 10/1960, skulu auk þess, sem fyrir er mælt í lögum nr. 51/1968 um bókhald, haga bókhaldi sínu þannig, að skattyfirvöld geti á hverjum tíma gengið úr skugga um réttmæti söluskattskýrslna, og á það einnig við um þá, sem ekki eru taldir bókhaldsskyldir samkvæmt áðurgreindum lögum um bókhald.

16. gr.

Reki aðili margþætta starfsemi, þannig að sumir þættir hennar eru söluskattskyldir, en aðrir söluskattfrjálsir, skulu hin söluskattfrjálsu og söluskattskyldu viðskipti greinilega aðgreind bæði í bókhaldi hans og á söluskattskýrslu.

17. gr.

Söluskattskyldir aðilar skulu annaðhvort hafa í aðalbókhaldi sínu sérstaka reikninga fyrir þær fjárhæðir, er færa skal á söluskattskýrslu, eða færa þær í sérstakar undirbækur eða yfirlit, sem byggð eru á aðalbókhaldinu. Færslum skal þannig hagað, að rekja megi einstakar fjárhæðir á söluskattskýrslu til þeirra gagna, sem á er byggt, bæði að því er varðar skiptingu heildarveltu og frádráttar.

Fyrir gjalddaga hvers uppgjörstímabils skal stemma af og skrá niðurstöður þeirra reikninga, bóka eða yfirlita, sem færslur á söluskattskýrslur byggjast á. Öll gögn varðandi söluskattskýrslur skulu geymast eins og önnur bókhaldsgögn.

18. gr.

Sérhver sala eða afhending á vörum, verðmætum og þjónustu skal skráð í frumbækur, jafnskjótt og salan eða afhendingin fer fram, þar með talin hvers konar afborganaviðskipti, viðskipti gegn víxlum eða viðskipti, sem fram fara á annan hliðstæðan hátt. Ef afhending seldra vara fer fram í mörgu lagi, skal skrá hverja einstaka afhendingu í frumbækur.

Í bækur þessar skal skrá dagsetningu, nafn og heimilisfang kaupanda, tegund sölu, magn, einingarverð og heildarfjárhæð. Hver nóta eða reikningur í frumbók skal einnig bera greinilega með sér nafn og heimilisfang seljanda.

Heimilt er að hafa laus reikningseyðublöð í stað frumbóka. Blöð frumbóka og laus reikningseyðublöð skulu vera fyrirfram tölusett í samfeldri töluröð, enda sé ekki notað öruggara eftirlitskerfi.

Frumbækur og reikningar skulu færðir a. m. k. í tvíriti. Óski viðskiptamaður þess, skal honum ætíð látið í té samrit í hvert sinn, er afhending vöru eða þjónustu fer fram. Eitt eintak skal varðveitt í réttri töluröð, og skal vera hægt að rekja færslu á sölu í bókhald til þeirra frumgagna, sem færslurnar byggjast á.

Þegar selt er til endurseljenda, sbr. 6. gr., eða sala er undanþegin söluskatti skv. 4.—10. lið 13. gr., skal jafnframt eitt eintak af söluótum eða reikningum liggja fyrir í stafrófsröð, ef ekki er færð sérstök viðskiptamannabók yfir alla slíka sölu, og gildir það bæði um lánsölu og staðgreiðslusölu.

19. gr.

Reikningar og nótur skulu bera greinilega með sér, hvort söluskattur er innifalinn í heildarfjárhæð eða ekki. Þegar söluskattur er ekki innheimtur af heildarfjárhæð reiknings, skal söluskatturinn tilgreindur sérstaklega, og koma skal greinilega fram, af hvaða fjárhæð hann er reiknaður.

20. gr.

Þegar seldum verðmætum er skilað til seljanda, skal gefa út innleggsnótu (kreditnótu) með tilvísun til fyrri úttektarnótu eða -reiknings. Sama gildir um afslátt, sem veittur er, eftir að nóta eða reikningur hefur verið skrifaður, svo og leiðréttingar á fyrri reikningum.

21. gr.

Þeir, sem taka framleiðslu annarra til vinnslu og/eða endursölu, skulu gefa út innleggsnótur (afreikninga) eða móttökukvittanir, og gilda sömu reglur um efni þeirra og rakið er í 18. gr., eftir því sem við á. Á þetta m. a. við um kaup eða móttöku samlaga, samvinnufélaga og annarra aðila á framleiðsluvörum bænda, sjávaraflla og hvers konar iðnaðarvörum, fullunnum og hálfunnum.

22. gr.

Staðgreiðslusala smásöluverzlana og hliðstæðra aðila, svo og persónuleg þjónusta, sem veitt er gegn staðgreiðslu, er undanþegin skráningarskyldu í frumbók, skv. 18.—21. gr. hér að framan. Þegar slika sala er ekki færð í fyrirfram tölusetta frumbækur eða á reikninga, sbr. 18. gr., skal annaðhvort nota áritaða strimla úr lokuðum sjóðvélum sem fylgiskjöl fyrir innfærslu á staðgreiðslusölu í bókhald eða færa daglega staðgreiðslusöluyfirlit í fyrirfram innbundna, tölusetta bók, sem liggja skal til grundvallar fyrir færslu á staðgreiðslusölu í bókhald.

Í slíkri bók skal a. m. k. eftirfarandi koma fram:

Peningar og ávísanir við lok starfsdags	kr.
+ Útborganir; t. d. greidd vörukaup, laun, peningaúttekt eiganda, lagt í banka, afborganir o. s. frv. ...	—
	<hr/>
	Kr.
÷ Innborganir; t. d. innborganir frá skuldunautum, húsaleiga og aðrar innborganir, sem ekki teljast sala	—
	<hr/>
	Kr.
÷ Peningar við upphaf starfsdags	—
	<hr/>
Staðgreiðslusala dagsins (m/söluskatti)	Kr.

Fylgiskjöl fyrir staðgreiðslusölu, samkvæmt þessari grein, skulu áritast af verzlunarstjóra eða öðrum ábyrgum starfsmanni.

23. gr.

Þegar notað er annað öruggt eftirlitskerfi en lýst er í 18.—22. gr., getur fjármálaráðuneytið veitt undanþágu frá einstökum ákvæðum þeirra.

24. gr.

Eigi er seljanda vöru eða þjónustu heimilt að falla frá innheimtu söluskatts, nema óbyggjandi sé, að ekki sé um sölu til neytanda að ræða.

Sala söluskattskylds verðmætis án söluskatts er aldrei heimil, nema kaupandi hafi tilkynnt starfsemi sem endurseljandi þeirrar vöru eða vinnu, sem seld er, og hafi í höndum skírteini, sbr. 6. gr.

Nú hefur endurseljandi keypt vöru, vinnu eða þjónustu og greitt af því söluskatt, og er honum þá heimilt að draga innkaupsverðið frá söluskattskyldri veltu sinni, sbr. 28. gr. Hafi hann hins vegar enga söluskattskylda veltu fram að telja eða söluskattskyld velta hans nemur lægri fjárhæð en nefnd innkaup, skal hann fá endurgreiddan þann söluskatt, sem hann þannig hefur ofgreitt. Endurgreiðsla kemur þó eigi til greina, nema hinn ofgreiddi söluskattur sé minnst kr. 1 000 á ári.

25. gr.

Söluskattur miðast við heildarendurgjald eða heildarandvirði vöru, starfsemi og þjónustu án frádráttar, nokkurs kostnaðar eða þjónustugjalds, án tillits til þess í hverju greiðsla er fólgin og þótt um sé að ræða skipti gegn vöru eða þjónustu. Söluskattur samkvæmt reglugerð þessari telst þó ekki með heildarandvirðinu.

Sé um að ræða skipti á vöru eða þjónustu, gjafir, afhendingu vara án endurgjalds, úttekt eiganda úr eigin fyrirtæki eða ef greitt er í vörum eða þjónustu, skal miða við almennt gangverð í sams konar viðskiptum.

Við sölu vara í umboðssölu skal skatturinn reiknast af heildarandvirði vörunnar. Framreiðsla á veitingastöðum telst ekki umboðssala.

Af skemmtunum, sem aðgangur er seldur að, skal söluskatturinn reiknaður af söluverði aðgöngumiða að meðtöldum skemmtanaskatti. Sé aðgangur ekki seldur, skal skatturinn miðast við veltu, sem svarar til raunverulegs kostnaðar við skemmtunina.

26. gr.

Vanræki aðili að taka söluskatt af vöru, vinnu eða annarri þjónustu, sem söluskattskyld er samkvæmt reglugerð þessari, ber honum eigi að síður að standa skil á söluskattinum.

V. KAFLI

UM FRAMTÖL, GJALDDAGA, INNHEIMTU, DRÁTTARVEXTI, KÆRUR OG ÚRSKURÐI

27. gr.

Söluskattskyldir aðilar og aðrir, sem tilgreindir eru á söluskattskrá, sbr. 5. gr., skulu ótilkvaddir, á þar til gerðum eyðublöðum, senda skattstjóra í umdæmi því, þar sem þeir eru heimilisfastir, skýrslu um heildarveltu sína fyrir tveggja mánaða tímabil í senn, þar með talin úttekt til eigin nota, svo og upplýsingar um frádrátt, söluskattskylda sölu og söluskatt þann, sem inna ber af hendi.

Söluskattskýrslu með upplýsingum um heildarveltu og frádrátt ber einnig að skila skattstjóra fyrir hvert uppgjörstímabil, þótt ekki hafi verið um söluskattskylda sölu að ræða.

Sérhver aðili, sem rekur starfsemi í fleiri en einni starfsemisgrein, skal, eftir nánari ákvörðun skattstjóra, láta í té sérstaka söluskattskýrslu fyrir hverja þeirra. Skattstjóri getur ákveðið, að aðili, sem rekur starfsemi á fleiri en einum stað, skuli láta í té sérstaka skýrslu fyrir hvern starfsstað.

28. gr.

Á söluskattskýrslu skal greina, auk nafns greiðanda og fleiri auðkenna, eins og skýrslueyðublaðið ber með sér:

A. Heildarveltu:

1. Heildarandvirði allra seldra vara, þar með skattfrjálsra vara, svo og seldrar vinnu og þjónustu án nokkurs frádráttar og að meðtöldum söluskatti.
2. Úttekt greiðanda úr eigin fyrirtæki, þar með taldar þær vörur, vinna og þjónusta, sem út er tekin til afnota fyrirtækisins sjálfs. Skattverðið miðast við almennt söluverð.
3. Annað, svo sem verðmæti vöru eða þjónustu, sem látin er í skiptum eða sem greiðsla fyrir vöru eða þjónustu.

B. Frádrátt:

1. Söluverð þeirra vara og þjónustu, sem undanþegin er söluskatti.
2. Söluverð skattskyldra vara, sem seldar eru til endurseljenda án söluskatts, enda liggja fyrir sölunótur yfir söluna, sbr. 18. gr.
3. Innkaupsverð þeirra vara, vinnu og þjónustu, sem endurseljandi kann að hafa keypt til endursölu með söluskatti.
4. Annar frádráttur:
 - 4.1. Útsöluverð á tóbaksvörum, benzíni og olíu, sbr. 3. og 4. lið 33. gr., þ. e. til frádráttar heildarveltu á hverju uppgjörstímabili skal færa það söluverðmæti, sem Áfengis- og tóbaksverzlun ríkisins og innflytjendur benzíns og olíu hafa gert aðila að greiða skatt af á sama uppgjörstímabili.
 - 4.2. Söluverð aðgöngumiða, sem söluskattur hefur verið greiddur af, sbr. 2. lið 33. gr.
 - 4.3. Vinnu við húsbyggingar, skipa- og loftfaraviðgerðir eða aðra sölu-skattfrjálsa sölu, sem kynni að vera innifalin í heildarveltu og ekki er talin hér áður.

Ef frádráttur skv. B-liðum er eitthvert uppgjörstímabil hærri en samanlögð velta skv. A-liðum, þá skal það, sem umfram er, dregið frá veltu næsta eða eftir atvikum næstu uppgjörstímabila eða endurgreitt skv. síðustu mgr. 24. gr.

Söluskattskyldur aðili skal til viðbótar því, sem skýrslueyðublöðin gefa til-efni til, skýra frá öðrum atriðum, sem kunna að skipta máli um söluskattskilin. Einnig er söluskattskyldum aðila skylt að láta skattyfirvöldum í té í því formi, sem óskað er, nánari sundurliðun á skattfrjálsri sölu og öðrum frádráttarliðum, svo og styðja þá gögnum, ef þess er óskað.

29. gr.

Skattstjóri skal rannsaka söluskattskýrslur og leiðréttta skattinn, ef hann er rangt tilgreindur, og einnig skulu skattstjórar áætla söluskatt af viðskiptum þeirra aðila, sem ekki senda skýrslu innan tilskilins tíma, senda enga skýrslu eða ef skýrslu er ábótavant.

Skattálagningu skal lokið innan mánaðar frá lokum hvers uppgjörstímabils og skattupphæðin tilkynnt innheimtumanni og skattgreiðanda.

30. gr.

Söluskattskýrslu, sbr. 1. mgr. 27. gr., skal skilað fyrir hvert tveggja mánaða tímabil. Gjaldþagi söluskatts er 15. dagur næsta mánaðar eftir lok uppgjörstímabils og eindagi 15. dagur næsta mánaðar eftir gjaldþaga. Beri eindaga upp á helgi-dag eða almennan frídag, færist eindagi á næsta virkan dag. Þannig verður gjald-dagi fyrir fyrsta tímabil hvers árs (þ. e. janúar, febrúar) 15. marz og eindagi 15. apríl.

31. gr.

Skattstjóri getur heimilað þeim, sem hafa smávægilegan rekstur með höndum, að telja fram einu sinni á ári, enda sé söluskattskyld velta yfirleitt minni en kr. 100 000 á ári.

32. gr.

Hafi einhver, sem greiða skal söluskatt, eigi skilað honum á eindaga, falla á dráttarvextir, 1½% fyrir hvern byrjaðan mánuð, talið frá gjalddaga. Innheimtumaður getur látið lögregluna stöðva atvinnurekstur þeirra aðila, sem ekki gera skil á skattinum á tilsettum tíma, með því m. a. að setja verkstofur, skrifstofur, útsölur, tæki og vörur undir innsigli, þar til full skil eru gerð.

33. gr.

Eftirfarandi sérákvæði gilda um innheimtu söluskatts af neðantalinni starfsemi og viðskiptum:

1. Seljendur skulu innheimta söluskatt af verði allrar söluskattskyldrar vöru og þjónustu, sem seld er í smásölu, og skiptir þá ekki máli, hvort um er að ræða sölu til neytenda eða endurseljenda. Þó skal ekki innheimta söluskatt af sölu á timbri, trjávörum, steypustyrktarjárni og sementi til endurseljenda, sbr. 6. gr.
2. Söluskatt af aðgangseyri að skemmtunum, sem eru skemmtanaskattskyldar, skal innheimta með skemmtanaskatti. Söluskatt af aðgangseyri að skemmtunum, sem ekki eru skemmtanaskattskyldar, skal innheimta, þegar leyfi er veitt til skemmtunar, nema um fastan rekstur samkomuhúss sé að ræða.
3. Af tóbaksvörum og eldspýtum, sem Áfengis- og tóbaksverzlun ríkisins selur, skulu þeir aðilar, sem hafa með höndum smásölu slíkra vara, greiða henni söluskatt af þeim vörum, um leið og þeir greiða kaupverð varanna, og skal skatturinn miðaður við smásöluverð.
4. Innflytjendur olíu og benzíns skulu taka söluskatt við sölu eða afhendingu þessara vara til umboðsmanna sinna eða annarra aðila. Skatturinn skal miðast við smásöluverð.
5. Ef ársvelta nemur eigi meiru en kr. 1 000, skal söluskattur ekki innheimtur.

34. gr.

Þeir, sem ekki vilja sætta sig við ákvörðun skattstjóra á söluskatti, geta kært hann til hans innan 10 daga, frá því að skattur var ákveðinn. Skattstjóri skal kveða upp úrskurð um kærana og tilkynna úrskurðinn í ábyrgðarbréfi innan 10 daga frá lokum kærufrests.

Úrskurði hans má áfrýja til ríkisskattanefndar, sem kveður upp fullnaðarúrskurð.

Kærufrestur til ríkisskattanefndar skal vera 15 dagar frá dagsetningu úrskurðar skattstjóra og úrskurðarfrestur ríkisskattanefndar jafnlangur.

Fjármálaráðherra hefur heimild til að skjóta ákvörðun skattstjóra til ríkisskattanefndar án tillits til kærufrests.

Áfrýjun skattákvörðunar eða deila um söluskattskyldu frestar ekki eindaga skattsins né leysir undan neinum þeim viðurlögum, sem lögð eru við vangreiðslu hans, og ef söluskattur er lækkaður eftir úrskurði eða dómi, skal endurgreiða það, sem lækkuninni nemur.

35. gr.

Ágreining um söluskattskyldu og -skattthæð má bera undir dómstóla, en það skal þó gert innan 6 mánaða frá því ríkisskattanefnd úrskurðaði málið.

VI. KAFLI UM EFTIRLIT, UPPLÝSINGASKYLDU OG VIÐURLÖG

36. gr.

Skattstjórum er heimilt að krefjast af þeim, sem telja má gjaldskylda, allra nauðsynlegra gagna til skýringar á söluskattskýrslum. Enn fremur er skattyfirvöldum heimilt að krefjast aðgangs að bókhaldsgögnum aðila, samningum, verzlunarbréfum og öðrum slíkum skjölum, til athugunar og endurskoðunar. Á sama hátt er heimilt að krefja söluskattskylda aðila og ábyrga forstöðumenn söluskattskyldra fyrirtækja eða stofnana um nauðsynlegar upplýsingar, svo og, að þeir veiti eftirlitsmönnum eða endurskoðendum skattyfirvalda aðgang að skrifstofum, vinnustöðvum, vörugeymslúhúsum og öðrum þess háttar stöðum til birgðakönnunar og annars eftirlits með viðskiptum hlutaðeigenda.

Þá hafa skattstjórar rétt til þess að krefjast upplýsinga af þeim, er hafa keypt af söluskattskyldum aðila eða selt honum vörur eða haft við hann önnur viðskipti, þar með að krefja húseigendur um upplýsingar um atvinnurekendur og aðra, sem hafa verzlun, verkstæði, skrifstofur eða aðra starfsstöð í húsum þeirra. Einnig skulu félög og félagasamtök atvinnurekenda, iðnaðarmanna og annarra viðkomandi aðila skyld að gefa upplýsingar um féлага sína og atvinnu þeirra og rekstur.

Opinberar stofnanir skulu veita aðgang að öllum gögnum, er að dómi skattstjóra eru nauðsynleg til endurskoðunar framtals og ákvörðunar skatts, og er forstöðumönnum og starfsmönnum nefndra stofnana skylt að láta skattstjóra eða starfsmönnum hans í té alla nauðsynlega aðstoð og upplýsingar, sem óskað er eftir og unnt er að veita.

37. gr.

Skatt- og tollyfirvöldum, starfsmönnum þeirra og erindrekum er hannað, að viðlagðri ábyrgð eftir ákvæðum almennra hegningarlaga um opinbera starfsmenn, að skýra óviðkomandi mönnum frá því, er þeir komast að í starfi sínu um viðskipti einstakra manna og fyrirtækja. Þessi þagnarskylda og ábyrgð hennar helzt, þó að hlutaðeigandi starfsmenn láti af starfi sínu.

38. gr.

Ef söluskattskýrslu er ekki skilað til skattstjóra innan tilgreinds tíma og skattur því áætlaður, skal ekki lækka skatt aðila, þótt hann kæri, nema hann sanni, að skattskyld velta hans hafi verið áætluð meira en 10% hærrí en hún var í reynd. Sé hin áætlaða upphæð meira en 10% hærrí, skal reikna skatt af hinum raunverulegu upphæðum að viðbættum 10%. Sé mismunur minni en 10%, skal greiða skatt af þeirri upphæð, sem áætluð var.

Ef söluskattskýrslu er ábótavant og skattur hefur verið áætlaður af þeim sökum, skal ekki lækka skattinn nema aðili hafi komið með fullnægjandi skýringar á þeim atriðum, sem vafi gat leikið á um. Heimilt er að heita ákvæðum fyrstu málsgreinar, ef ekki er bætt úr ágöllum á framtalsskýrslu innan tilskilins kæru- frests. Skattstjórum er heimilt að áætla söluskatt aðila, ef í ljós kemur, að söluskattskýrsla styðst ekki við tilskilið bókhald skv. IV. kafla reglugerðar þessarar. Enn fremur er heimilt að áætla söluskatt aðila, ef ekki eru lögð fram gögn þau eða bókhaldsbækur, sem skattyfirvöld kunna að biðja um til sannprófunar framtali hans.

Ekki þarf að heita ákvæðum fyrstu málsgreinar, ef skattaðili færir gildar ástæður sér til afsökunar, og skal það metið hverju sinni eftir aðstæðum, hvað teljast skuli gildar ástæður í þessu sambandi.

Sé skattur vanreiknaður eða viðskipti dregin undan, má gera aðila að greiða söluskatt 5 ár aftur í tímann.

39. gr.

Nú skýrir söluskattskyldur aðili af ásetningi eða stórfelldu gáleysi rangt frá því, er máli skiptir um söluskatt hans, og skal hann þá greiða sekt, sem skal eftir málavöxtum ákveðin allt að tífaldri þeirri söluskattsupphæð, sem tapast hefur við vanrækslu hans eða rangfærslu, og auk þess greiði hann hinn vantalda söluskatt.

Nefnd sú, sem starfar skv. 6. mgr. 48. gr. laga nr. 90/1965 um tekjuskatt og eignarskatt, ákveður sektir samkvæmt þessari grein, nema fjármálaráðherra eða sökunautur óski eftir, að máli sé vísað til dómstóla.

40. gr.

Brot þau, sem um ræðir í 39. gr., ef málum út af þeim er vísað til dómstóla, misnotkun skirteina þeirra, sem um ræðir í 6. gr., vanræksla söluskattskylds aðila á því að tilkynna starfsemi sína, svo sem fyrir er mælt í 5. gr., vanræksla eða tregða á að veita upplýsingar eða láta í té aðstoð eða gögn, varðar sektum í ríkissjóð allt að kr. 100 000 eða varðhaldi, nema þyngri refsing liggji við samkvæmt öðrum heimildum.

Refsiákvæðum reglugerðar þessarar skal heita gegn eigendum, stjórnendum eða framkvæmdastjórum fyrirtækis eða atvinnurekstrar.

Sektir samkvæmt grein þessari má innheimta með aðför.

Mál út af brotum á reglugerð þessari skulu rekin að hætti opinberra mála.

VII. KAFLI

ÝMIS ÁKVÆÐI

41. gr.

Um þau atriði, sem ekki eru sérstök ákvæði í reglugerð þessari, fer skv. lögum nr. 90/1965 um tekjuskatt og eignarskatt.

42. gr.

Með reglugerð þessari er felld úr gildi reglugerð nr. 15 31. marz 1960 um söluskatt.

43. gr.

Reglugerð þessi, sem sett er samkvæmt heimild í lögum nr. 10/1960 og nr. 3/1970, sbr. og lög nr. 61/1964, 40 gr. laga nr. 7/1963 og 1. gr. laga nr. 76/1967, öðlast gildi hinn 1. september 1970. Fyrsti gjalddagi samkvæmt reglugerðinni er 15. september 1970, og fellur þá í gjalddaga innheimtur söluskattur í júlí og ágúst 1970, en eindagi hans er 15. október 1970.

Fjármálaráðuneytið, 21. ágúst 1970.

Magnús Jónsson.

Jón Sigurðsson.